




God's Word Life for All

THE BIBLE SOCIETY OF UGANDA

# SABITI MA BAIBUL 2012

“I GO  
WANWANJO  
KWO AKA  
WAWOTHO  
KENDO  
WALAMA.”  
Tim 17:28 (ESV)



**DHOPADHOLA**



## Bible society me Uganda SABITI MA BAIBUL 2012

**WICH WACH: I GO WANWAŃO KWO AKA WAWOTHO KENDO WALAMA.  
Tim 17:28 (ESV)**

### Gima mako kwo Sabiti ma Baibul

Sabiti ma Baibul obedo gima kitipa pa jo Bible Society ma Uganda (BSU) chano kis oro kanyachiel gi Kanisin gi kitipin ma jotiyere gi kanisin. Me obedo gima timere ka oro kidho ka rumo i chakirok ma dwe mar'apar g'aryo kosa ka dwe mar'apar g'achiel rumo. I oro me, Sabiti ma Baibul le bedo wok i **Sabiti ka 2 Decemba tundo i Sabiti ka 9 Decemba 2012.**

I Sabiti me, Kanisin, Kitipin, kodi ji wegi imiyo jo men timo gigipiny me;

1. Syemirok gi wach m'ondikere i nger m'opokere.
2. Kwayo ri tich pa kitipa pa jo Bible Society jye.
3. Kwayo ji ma jondikere gi BSU chiewo ndikirok pajo.
4. Miyo joman men ndikirok gi BSU.
5. Choko mich manyakare ma thyelo tich pa jo Bible Society of Uganda.
6. Dhiro mich m'ochok ri Bible Society i nger m'otire.
7. Luwo kwonj tich, or, kodi atorja pa jo Bible Society.
8. Kuro Sabato ma Baibul ka 2 Decemba kodi Sabiti ma Baibul ka 8 Decemba.
9. Miyo ji men ma kisoma Baibul kodi wach pa Were i madala jye ma kwo.
10. Kama nyalere chano poko Baibul i kanisin, tektek kama ile bed'iye gi Sabiti ma Baibul.

Sabiti ma Baibul miyo silwany m'opokere ri Kanisin kodi ji thyelo kodi tinjo malo oro Baibul paka men iy'oriwa; obedo gimadwonj nike kis jokristo jye jowokur.

Wich wach ma Sabiti ma Baibul oro 2012 obedo ni, **“I go wanwaŃo kwo aka wawotho kendo walama. Tim 17:28 (ESV).** Pama a hongo ri jokristo jye ridho kabedo pajo i Ruoth aka Jaboth Yesu Kristo! Wakinyal medo ywak gi piny panini geno ongoye. Hongo otyeko tundo ma lero ma delkwonj Kristo i piny me; Kanisa menyo mudho moro jye. Jokristo joripo riwo dwondi jo, riwo yeyo pajo kanyachiel lwenyo gi kidakana i madala jye ma kwo. Ji jothokere gi mindin kweth ma ka nyatoro ongoye gi geno ma both kinyal fwoyo chano pa Jachwech manyawere were. Obedo kwayo mawan kodi geno nike **Sabiti ma Baibul me 2012** le miyo wan silwany madwonj wok i wach pa Were bedo munyo **Wakwo, Wawotho aka Walama** i Ruoth Yesu Kristo noknok makada nende obedi aŃo.



## WICH WACH: I GO WANWAŃO KWO AKA WAWOTHO

### NDELO 1:

#### Were Ba wan: Chako kodi Gike

“Ruoth wacho ni, “Biye win wikel banja mewin i kapido, wey jowomiyere ryeko kanyachiel! Ija m’owacho gime chango? Ija m’otucho chon? K’obedo an, Ruoth? Ongoye were man kendo, Were ma timo gim’otire aka botho, ongoye ņat man kendo kwanyowoko an. Wire win bongan aka wibothi, ji jye ma piny gi be!

Kole an abedo Were, aka ongoye man kendo.” *Isaya 45:21-22*

“Aņata marapena kendo machowe,” Ruoth Were Majameni jye wacho; go ma nitye pama, mobedo chon, kendo bino bedo. *Menyirok 1:8*

Yesu Kristo kiwire nyoro, konon, kodi chil gi chil. *Joebrania 13:8*

“Ija m’otimo to miyo gime timirok, lwoņo lusin wok i chakirok? An, Ruoth, abedo marapena, aka ale bedo machowe.” *Isaya 41:4*

“Ija ma chale an? Wey go wotuch, wey go wowodhi kamaler to jyengo ruwaņan. Ija m’otyeko kilanga wok chiene gigipiny ma le bino? Wey go wowach ri wan gima fuodi le bino. Wikir wikirin, kosa wibedi malwor; fuodi akiwacho ri win wok chiene t’awodho kamaler? Wibedo wajulisi paran! Odoko nitye were moro jye kwanyowoko an? Ongoye tele man; akuya ran kad’achiel.” *Isaya 44:7&8*

### Kwayo:

*Were ba wan ma i polo, itek i men botho kodi gonyo. Wayeyo komo mawan konon aka wawire bongin ri kony. In moido initye wok i chakirok, initye kir pama, aka ile bedo kir i gike. Miŷ wan loyo kwoņ kis gima tweyo wan paka ji, pechin, lwak kodi Kanisa. I nyingi Yesu wakwayo. AMEN*

### NDELO 2:

#### Wey waketh Madala ma Kwo

*Were otyeko ketho kite ma kwo I piny me, aka go oketho i Ndiko Maleŷ. Go ama dhumo kis gimoro.*

“Gwokere win wacho ni, “Men paran kodi teko ma chingan won ama okelo ran lim me.” To poy win Ruoth Were mewin, kole go ama miyo win men ma nwaņo lim, ņey woridh chikirok pere m’okuoņere ri kwarere mewin, paka go timo konon.”

#### *Chik 8:17&18*

“Kitawo ma chik me wokir woeye i dhokin; ifuonjere kwoņe odyechieņ gi wor, ņey inyal gwokirok timo paka ondik kis gimoro jye manitye iye. Nyaka ameno ile loko yoo perin maber, aka le kadho kodin maber. Pama onyo amiyin or: Bedi michwiny kendo jamisen; ikir ikirin kosa ibwok, kole Ruoth Were perin nitye kodin kis kamoro jye m’ikidh’iye.”

#### *Joshuwa 1:8&9*

“Fuore awi jayach, ka fuodi ibedo soye, aka wey chunyin wosangala in i hongo perin ma soye. Woth i yoo ma chunyin kodi i kigomba ma waņin, to ņey nike ri gigipiny me jye



Were le thumo rin banja.” **Jafuonji 11:9**

“Gi chunyan jye arangin, ikir iweyan achier i kuro or perin!” **Zabul 119:10**

“Kenyo Ruoth owacho ran wacho ri ji ni, “Winji win! An, Ruoth, amiyo win yero i dyer yoo makelo kwo kodi yoo makelo tho.” **Yeremia 21:8 GNB**

“Win wijati wibedo lero ma piny. Tindi moger wi tendere madwoŋ kipanere. Ongoye ŋata chwinyo tala to ryewo i agono; kuchiel go ripo ŋawo tala no malo kuma nyalo miyo lero ri ji jye ma ot.” **Matayo 5:14&15**

“Yesu owacho ni, “Neni, abino mayot; ani gi kemba paran, ma alemiyo kis nyatoro chungo kwonŋ gima go otimo. **Menyirok 22:12 GNB**

### Kwayo:

*Ba wan Majamen i Polo, wakwayin gi mwolo i nyingi Yesu konyo wan kuro madala ma kwo ma ityeko ketho i ndiko perin maleŋ i kwo mawan i piny me. Ka waromo gi teko, miy wan misen wakir watim nyakuchiel ŋey wanyal kwo chil gi chil. Wakwayo i nyingi Yesu. Amen*

### NDELO 3:

#### Ŋeyo hongo kodi ndir

“Aka munyo go ochore chiegin to neno tindi madwoŋ, go oywak, ka wacho ni, “Yesu otundo chiegin gi tindi aka munyo oneno tindi no, oywako munyo wacho ni, “Bedi kada konon won ŋey gima d’okelo rin syem! To gino opanere ri waŋin. Jobino reyin woko kichutho gi ji ma nitye i chiel perin; ongoye tele kada achiel ma jowey i wiy nyawote, rupiri ikinyalo ŋeyo ndir ma Were owend’iye rin.” **Luka 19:41-42 & 44(b)** “Ruoth owacho ran ni, “Atyeko timo chikirok gi odyechieŋ kodi wor, ŋey noknok jowobedi I hongo pajo ma ripo; aka chikirok no kinyal turo.” Yeremia 33:19&20 GNB Ri kis gimoro nitye hongo m’oyik, hongo ma ripo ri kis gima nitye i pendi polo. **Jafuonji 3:1 GNB**

Kole kis gimoro nitye gi hongo mere ma ripo kodi yoo, rokwoŋbedo teko pa ji dwon kwon jo. Adyer, go kuya gima le bedo, rokwoŋbedo ŋa m’owach ri go paka le bedo? **Jafuonji 8:6&7 GNB**

“Paka piny fuodi nitye, bino bedo hongo ma chwoyo kodi hongo ma kecho, ŋicho kodi lietho, hongo ma chwir kodi hongo ma koth, odyechieŋ kodi wor.”

#### **Chakirok 8:22**

To munyo hongo motire otundo, Were ooro Wuode won, ma dhako bende ama onywolo, aka obedo i Chik pa Joyudaya, ŋey wogonyi joma oido jonitye i men pa Chik, aka ŋey nyaka walokere nyithindho pa Were akela. **Jogalasya 4:4&5 GNB**

### Kwayo:

*Ba wan ma i polo, in iyero ndir, hongo kodi ndelo. Wakwayin gi mwolo konyo wan oro ndir maber ka jobino. Yaw ri ji perin royo wotho kodin noknok ka joromo gi teko ro ndir. Wakwayo i nyingi Yesu. Amen*

**NDELO 4:****Bedo Jakan ma iripo bedo**

“Dhano ma genere i gikipiny mathindho ibino geno go i gimadwoŋ; ŋata kigenere i gikipiny mathindho kogen go i gimadongo. Amomiyo ka wikinyalo genirok i ŋango ma kotire ma piny ka, ŋa ma di gen win gi ŋango maradyeri? Aka ka ikinyalo genirok i gikipiny pa ŋat man, ŋa m’omiyin gim’obedi aperin won? **Luka 16:10-12**

“Piny kodi kis gima nitye iye obedo apa Ruoth. Piny kodi ji ma jobed’iye obedo apa Ruoth. Kole Ruoth ogeto piny i wi nam, aka ogeto kindi mere i wi wakawaka madongo.” **Zabul 24:1&2**

Amomiyo, dhano jye kwoŋ wan bino tito gima mako kwoŋ kwo pere ri Were. Amomiyo wawey win thumo banja ri jowoti wan. Kuchiel, me a gima wiripo ridho: wikiri witim gimoro jye ma miyo nyawoti win chier, kosa podho i gimarach.”

**Joroma 14:12&13**

“Wiripo neno wan paka jotich pa Kristo, momiy jo adyeri pa Were mopanere. Onyo gima yenyere kwoŋ dhano moketh i tich meno a genirok ri ruoth pere.”

**1 Jokorinthya 4:1&2 GNB**

“Then God said, “And now we will make human beings; they will be like us and resemble us. They will have power over the fish, the birds, and all animals, domestic and wild, large and small.”” **Genesis 1:26 GNB**

Winji win jotel mewin, odoko bedi win ma wimwol ri jo, rupiri jo jokuro win paka joma ripo tito ri Were kite ma jotiyo gine. Ka wiwinjo jo, aka jobino timo tich pajo gi kisangala; ma kiweno gi chuny jo mochile, aka meno kinyal konyo win.

**Joebrania 13:17****Kwayo**

*Were ma chil gi chil, ba wan ma i polo, wabino bongin gi pusirop iy’adyer bedo munyo wajala i tich ma kan. Watyeko kisika woko dudi, wakikuro maber lim moido waripo kuro. Chiew wan kendo aka imiy wan bedo jokan maber inyingi Yesu. AMEN*

**NDELO 5:****Initye Kune?**

Ber ri kis jakristo kikaŋasa kwo pere noknok kodi yeyo woth pere gi Kristo

“28 Dhano jye ripo kutho kikaŋasa kwo pere ma fuodi kochamo mugat me kosa madho gima ni i agwata me.” **1 Jokorinthya 11:28 GNB**

Othieno no jowinjo mayindo pa Ruoth Were wotho i ndelo, aka jopondo kwoŋ yeni. To Ruoth Were lwoŋo jachwo, “Initye kune?” Chakirok **3:8&9 GNB**

“Kenyo odonjo i ŋungu nindo wor. Ruoth openjo go ni, “Elija itimo aŋo ka?”

**1Kerin 19:9**

Kole Were otyeko nyutho ji jye ŋono pere ma botho jo. Ŋono no funjo wan weyo kwo ma kilwor Were kodi awanya ma piny, bedo gi dhumirok i kwo, bedo gi tiro, gi



kwo molworo Were i piny ka. **Tito 2:11&12**

Aka ee achungo dho thigo agudo; ka moro owinjo dwondan to yawo, abino donjo i ot pere to achiemo gine, to bende chiemo kodan. **Menyirok 3:20**

“Simon, Simon, panen! Sitan oridho ri Were ni yenyo win, ñey woyeki win pa nyingi kal. 32 To atyeko kwayo ri win, nike yeyo mewin wokiri worumi woko. Aka ka ityeko gik bongan, imiyi wutimerin men.” **Luka 22:31 & 32**

“Nger nianj no urere ran swa; oñawere swa, yombo nianj paran. An’okidhi kune kwonj chunyin, kosa an’okwale kwonjin kune! Kakidho i polo, initye kenyo! k’anindo i piny pa jomotho, initye kenyo.” **Zabul 139:6-8**

## KWAYO

*Ba wan Malej ma jawor aka jakisa, wapakin rokwoñbedo iber aka mar perin bedo chil gi chil. Kony wan ñeyo kwo mawan i in. Fuonji wan ñeyo chan perin maber ri ji. Kony wan bedo ruwanjin noknok aka watim mito perin. I nyingi Yesu wakwayo. Amen*

## NDELO 6:

### Chakirok m’otire ma Kwo

Chako maber kodi kabedo maber, chowo maber.

“Aka me a wach ma ridho adyeri: ni Were otyeko miyo wan kwo makirum, aka kwo me nwañere i Wuode. Moro jye ma nitye gi Wuodi Were meno ni gi kwo me; aka moro jye mongoye gi Wuodi Were meno ongoye gi kwo.” **1Yohana 5:11&12 GNB**

“Añata abedo yath vini maradyeri, aka win wibedo jangi yath no. Ñata donj i an, aka abende adoñ i go, bino nyak madit; ato wikinyal timo gimoro jye ma bu an.

**Yohana 15:5**

Were wacho ni, “Abino botho jono ma jomaran to akuonga jono ma joyeyan paka Ruoth. Ka jolwoñan, abino dwoko jo, ka jobedi i teko, abino bedo gi jo. Abino botho jo to aworo jo. Abino miyo jo kema ma kwo mabor, Abino botho jo.”

**Zabul 91:14-16**

Go chwako gimarecho paran jye, aka chango two paran jye. Go botho kwo paran wok i bur, aka miyan silwany gi mar makiwire kodi kisa. Go poñjo kwo paran gi gigipiny mabeyo, ñey akir ati aka abedi matek paka año. **Zabul 103:3-5**

## Kwayo

*Were ba wan ma jachwech, wayeyo nike in ibedo chako ma kis gimoro jye ma mako kwonj kwo. Wakwayin itel wan kodi nyutho wan kis gimoro ma watimo. I nyingi Yesu wakway. Ameno.*

## NDELO 7:

### Ale neno go kir I gike

To paka Yesu kwo chil gi chil, tich pere paka jachwayi ri Were wi alitar odoko kikodi ri ñat man. Amomiyo, go nyalo botho kichutho joma kidho bongi Were kodi bonge,



rupiri go kwo chil gi chil ma pido gi Were ri jo ndelo jye. **Joebrania 7:24&25 GNB**

Derino ma wodho or bino bedo, to dwondi malaika madwoŋ winjere, kodi dwondi gwara pa Were, aka Ruoth won bino loro piny wok i polo! Jomotho munyo joyeyo Kristo jobino telo chierino; aka ŋey ibino choko wan ma wakwo i hongo no, kanyachiel gi jo i pondeponde kidho romo gi Ruoth i hongo malo. Ameno wabino bedo gi Ruoth ndir jye. Amomiyo, kweyi win chuny jowoti win gi wach me.

### **1Jothsalonika 4:16 - 18**

To aŋeyo nitye nyatoro I polo ma le bino i chowe thyelan. Kada rumachien ma two chamo delkwoŋan, kuchiel ka fuodi anitye i del me ale neno Were.

### **Yobu 19:25&26 GNB**

“Aka paka weeyo ichoko aka iwango i mach, apaka bende bino bedo i hongo ma giki ndir: Wuodi Dhano bino oro jomalaika bino choko wok i ker pere gimoro jye ma miyo ji timo gimarach, kodi joma recho jye, to jobolo jo i kendo madwoŋ ma mach, kama jobino ywak’iye kareno jokayo laki gin. Aka joma jotire jobino lyel pa mach i Ker pa Baa jo. Amomiyo winji win ka winitye gi ithi win!” **Matayo 13:40-43**

### **Kwayo**

*Ba wan Majameni, wakwayin gi mwolo konyo wan doŋ ruwaŋin. Wayeyo nike ile dwoko tero kanisa mongoye gi chilo. Kony wan bedo achiel kwoŋ Kanisa no i nyingi Yesu. Amen.*

## **NDELO 8:**

### **Kisangala ma chowo Maber**

*Ongoye kiganagana, ka wawoŋtho gi Ruoth, wachowo maber.*

*Kere Daudi ochako maber.*

“Kenyo Samwiri okwanyo mo to wiwo Daudi ruwaŋ wutmin go. Piyo no won chuny pa Ruoth oloro kwoŋ Daudi i men wok i ndelo no kadho yuwaŋe. Kenyo Samwiri oay to dok i Rama.” 1Samwiri 16:13

*Go onyutho geno mongoye lworo kodi goŋirok i Were paka jayach*

Munyo Goliath ochako chorok chiegin gi Daudi, Daudi oŋwecho piyo i bol ma lweny pa ja Filistia lweny gi go. Daudi orwako chinge i mugowa pere to fudho tele achiel m’olyero i asumulo; owito to goyo gine nyimi Goliath. Tele no odonjo i nyimi Goliath to Goliath podho piny gi nyime. Ameno apaka Daudi okengila Goliath, gi tele kodi asumulo; go ofwodo piny Goliath to neko go m’ongoye toŋ i chinge.!”

### **1Samwiri 17:48 -50**

“To go k’ochowo maber.” Samwiri odwoko Saulo ni, “Itimo gi miŋo; i kiluwo or pa Ruoth Were perin, ma go omiyin; bedi nende i luw or pa Ruoth, dinyo go oweyo nyikwayin to jodhumo Isiraili chil gi chil. To paka ikiluwo or pere, dhum perin kibino medirok. Ruoth otyeko rango jachwo ma ka chunye; aka oyero go dhumo ji pere.” **1Samwiri 13:13 & 14**

*Saulo k’ochako maberl*





“To Saulo otemo reyo woko kitipa pa jomoyeyo munyo wotho i kis dhoot pa jomoyeyo ka choko jo, chwo gi mon, aka bolo jo i twech.” **Tim 8:3**

“Saulo oido fuodi medere i hongo no gi ywoyo wach ma bwoko gi neko jofuonjirok pa Ruoth. Okidho bongi jadwoŋ pa jochwayi ri Were wi alitar, **Tim 9:1**

*Saulo owire to kwo ri Ruoth*

Gikenyo Chuny Maleŋ opoŋ kwoŋ Saulo, ma bende oŋeyere ni Paulo, to njiyo waŋ jathyeth no tirtir 10 to wacho ni, “In wuodi pa jwogi, m’ibedo jakwor gi gimoro jye motire, aka imore kodi thenethene marecho ma twodo, kere ikileweyo wirow adyeri pa Ruoth i twodo? Chingi Ruoth eno bino podho kwoŋin pama; waŋin bino tho, aka ikonon lero pa waŋchieŋ chowo hongo moro.” Piyo piyo no Elima owinjo munyo tor machol umo waŋe, to chako woth ariwa ariwa munyo temo nwango dhano m’omaki chinge to telo go royo. **Tim 13:9-11**

*Saulo miyo mijulisi pere i chowe*

“Atyeko lwenyo lweny maber, atyeko chowo ŋwech paran; atyeko kuro yeyo. Aka pama onyo otyek yiko ran sangarya ma tiro, ma Ruoth, Jathumi banja motire, bino miyan i Ndelo no, aka ki an kendan, to go bino miyo ji jye ma jokuro go wonenere.”

**2 Timothy 4:7&8**

*Kis dhano mito Kristo nyalo chowo maber*

“to ŋata omadhi pi ma abino miyo go odoko kibino winjo riyo kendo. Aka pi ma anomiy go bino lokere i go waŋ pi mamol to miyo go kwo makirum.” **Yohana 4:14** Atyeko wacho ri win gime ŋey wibedi i syem i riwirok kodan. Piny bino miyo wichandere. To bedi win miseni! Atyeko loyo chandirok ma piny!” Yohana 16:33

To Zakayo oay ochungo to wacho ri Ruoth ni, “Jadwoŋ, akidho miyo jochandi adech ma lim paran, odoko ka nitye nyatoro ma atyeko diyo kwoŋe gipere akidho dwoko ri go ma kalo meno diŋwen.” Aka Yesu owacho ri go ni, “Konon both otyeko bino i ot me, paka jame bende obedo nyakwar Ibrayimu; Luka 19:8&9

To bamere olwojo jotich pere munyo wacho ni, ‘Redi win! Keli win ruk mabeyo jye wirwaki ri go. Rwaki win ri go peta i lwet chinge gi war i tyende; 23 aka kidhi wikel rwath dhyaŋ machwe no wineki, aka weyi konon wachami kalima. **Luka 15:22&23** Aka mathoth kwoŋ jono ma jonindo i fukefuke ma lowo jo le chiew, megi i kwo makirum, megi i wichkwot ma chil gi chil megi i kwo ma bukony. **Daniel 12:2&3**

## Kwayo

*Ba wan ma i polo, geno mawan kodi yeyo mawan nitye i in. Kony wan chowo maber i kis gima watimo ka i piny kodi chil gi chil. Wakwayo ama jye I nyingi Yesu. AMEN*